


5355/3862(2)
c.2

石湖居士詩集



石湖居士詩集卷七

送子文雜言

陰谷雲低梅雨多
黃山滌源溪湧波
南風匝地送歸客
雙槩下瀨如投梭
嚴夫子君舉酒我其爲
君歌萬山叢
叢石鑿鑿官居破
屋巢煙蘿
杜鵑曉啼猿暮叫
客行到此真蹉跎
窮愁無復理一飲三歎息
城東黌舍有佳人
解后使我加餐食
同鄉更同調
目擊心已傳
蟄蟲欲作雷
奮地萬籟方
寂風行山吹竿
喚我醒連鼓相追攀
颺車電轂不可輩
但覺兩腋生飛翰
狂歌不必終曲戲
奕不必滿局有時不
揖上馬去出門大笑
驚僮僕窮鄉眼
冷見未曾道上囁
嚅相指目云此陘隘
何以有二士直

恐翩翩跨黃鵠廣文組解登王畿諸公貴人爭勸歸常
日心期有定論贈行不惜重費詞腰金佩璐衆目好汗
簡沉碑千載癡一尊有意重山嶽五鼎無心輕網絲嚴
夫子應領略別後頻書相發藥我旣爲萬頃之狎鷗君
勿作九臯之鳴鶴

新館

露稻粘明璫風茅袞高浪荒煙暗白道行行亂蛩響日
脚午未吐雲頭晚猶漲欣此半日涼籃輿走清曠病客
不堪暑茲行天肯相蚊蟲埽無跡秋意滿千嶂稍尋泉
石盟略褫簿書障鴿原定相念因風報無恙

臨溪寺

萬山繞孿岭二水奔瀕洞亭亭林中寺金碧燦欄棟解
鞍得蒲團卧受瓦爐供少捐一炊頃暫作百年夢無人
自驚覺幽禽正清哢倦客如殘僧無力供世用此行端
爲山紫翠迭迎送漱井出門去驚塵撲飛鞚

盤龍驛

聞雞一唱罷占斗三星没天高月徘徊野曠山突兀暗
蛩泣草露怨亂語還咽涼螢不復舉點綴稻花末惟餘
絡緯豪悲壯殷林樾小蟲亦何情孤客心斷絕魂驚板
橋穿足側石子滑行路如許難誰能不華髮高城謾回
首疊嶂屹天闕遙知秋衾夢千里一飄忽

竹下

松杉晨氣清桑柘暑陰薄稻穗黃欲卧槿花紅未落秋
鶯尚嬌姹晚蝶成飄泊犬駢逐車馬雞驚撲籬落道逢
行商問平生幾芒屨頰肩走四方爲口不計脚劣能濡
簞瓢何敢議囊橐我亦縻斗升三年去丘壑二俱亡羊
耳未用苦商略

寒亭

溝塍與澗合隴畝抱山轉向來六月旱此地免焦卷早
穗已垂垂晚苗猶剪剪一川豐年意比屋鬧雞犬老農
霜須鬢矍鑠黃犢健自云足踏地常賦何能免刈熟倩
人輸不識長官面康年無復事但恐社酒淺我亦有二
頃收拾尚可繭懷哉笠澤路歸鏟犁頭蘚

清逸江

微生本漁樵長日渺江海扣舷濯滄浪尚說天宇隘竭
來車馬路悒悒佳思敗黃塵撲眉鬚驅逐似償債羸驂
繫偏仄狂犬吠荒怪鄉心入旅夢一葉舞澎湃晨興過
墟市喜有魚鰕賣眼明見清江積雨助橫潰褰裳喚扁
舟艤碇不勝載不辭野渡險弄水聊一快

隱靜山

杯渡師道場

五峰抱巖扉千柱奠雲壑荒原蕞爾縣有此寶樓閣維
昔經營初衣錫化雙鶴杖頭具隻眼矯矯雲中落尊者
一笑許璇題照林薄庭柏有祖意石泉韻天樂清簧轉
碧雞飛梭擲蒼鵲號風飢虎怒失木啼猿愕英遊偶然

同吏檄乃不惡題名記吾曾醉墨芥丹堊

新嶺

瘦馬兀瞢騰荒雞號莽蒼絲窠胃朝露籬落萬珠網宿
雲拂樹過飛泉擘山響老桑踞潛蚪怪蔓掛騰蟒山行
何許深空翠滴羈鞅釀愁積雨寒破悶朝日放瞳瞳赤
幟張昱昱金鉦上浮動草花馥清和野禽唱僕夫有好
語沙平路如掌惟憂三溪阻橋斷山水漲

送通守趙積中朝議請祠歸天台

城頭千峰青繞屋城下灘流三百曲誰云偪仄復偪仄
尚有高軒肯來辱紅梅花下兩芳春春風惠和如主人
搶攘塵土簿書裏見此縑籍天球温厚祿故人車結轍

掉頭獨泛清溪月不從世外得超然世間誰肯如公決
生平我亦一沙鷗葦白蘆黃今正秋送公使我歸思動
破煙衝雨憶扁舟明年想見東山起我亦煎茶石橋水
道逢蓑笠把漁竿即是馬曹狂掾史

送詹道子教授奉祠養親

新安學宮天下稀先生孝友真吾師斑衣悞作長裾曳
二年思歸今得歸賤詞上訴人叵挽璽書賜可羣公歎
青山百匝不留人空與諸生遮望眼白雲孤起越南天
向來恨身無羽翰下馬入門懷橘拜身今却在白雲邊
鶴髮鬢鬢堂上坐兒孫稱觴婦供果世間此樂幾人同
看我風前孤淚墮一杯送舟下水西我欲贈言無好詞

徑須喚起東廣微為君重補南陔詩

道子教授奉祠諸生率余祖席如意院

暫移三席欵雲關木末闌干暮紫間絳帳莫貪江上路
青鞵先試水西山伯陽有道來重趼禦寇他年憶解顏
怪我抗塵驅俗駕諸公何事許追攀

淳安

以後十五首
公檄嚴杭道中

篙師叫怒破濤瀧水石如鐘自擊撞欲識人間奇險處
但從歛浦過桐江

嚴州

舟人云自
嚴二百灘

城府黃塵撲馬鞍一篙重探水雲寒耳邊眼底無公事
睡過嚴州二百灘

釣臺

臺上題詩甚多其最膾炙者曰世
祖功臣二十八雲臺爭似釣臺高

山林朝市兩塵埃邂逅人生有往來各向此心安處住
釣臺無意壓雲臺

桐廬

濕雲垂野淡疎林十日山行九日陰梅子弄黃應要雨
不知客路已泥深

富陽

不到江湖恰五年歛山青繞屋頭邊富春渡口明人眼
落日孤舟浪拍天

餘杭

春晚山花各靜芳從教紅紫送韶光忍冬清馥薔薇醜

薰滿千村萬落香

於潛

俚語云於潛昌
化鬼見亦怕

邑居官寺兩淒清
晚市都無菜可羹
何處直能令鬼怕
祇今猶自有人行

昌化

雙溪館
絕景也

翠染南山擁縣門
一洲橫截兩溪分
長官日永無公事
卧聽灘聲看白雲

百丈山

壽聖寺僧房甚雅潔
去王千嶺尚六十里

沐雨梳風有底忙
解鞍來宿贊公房
傳聞三嶺連天峻
未到王千已斷腸

昱嶺

竹輿揺兀走婆娑
石滑泥融側足過
昱嶺不高人已困
晚登新嶺奈君何

王千嶺

山靈設險合崢嶸
行客何須向此行
羸馬不前人雨汗
此身安得諱勞生

刈麥

麥熟連雨妨刈老農云得便
晴即大獲不爾當減分數

麥頭熟顆已如珠
小阨惟憂積雨餘
句我一晴天易耳
十分終惠莫乘除

插秧

種密移疎綠毯平
行間清淺縠紋生
誰知細細青青草
中有豐年擊壤聲

曬繭 俗傳葉貴即蠶熟今歲正爾

隔籬處處雪成窩
牢閉柴荆斷客過
葉貴蠶飢危欲死
尚能包裹一絲窠

科桑

斧斤留得萬枯株
獨速槎牙立暝途
飽盡春蠶收罷繭
更殫餘力付樵蘇

龍學尚書新安侯羅公挽詞二首 汝楫

今代丹臺籍頻年
綠野居鐵冠真御史
革履舊尚書短世
浮雲盡平生半稿餘
人言公不朽蘭玉照
前除一昨更調瑟如聞
欲賜環途殫泣西狩
望絕起東山華屋林
霏慘新阡草露班
春風埋玉淚重為庚
公潛

龍學侍郎清河侯張公輓詞二首

白水名多士清河最有聲
人危孔北海帝識柳宜城
蜀險談間固蠻訶到平凌
煙何處在風雨上銘旌
太息逢萋錦平生付薄冰
滄溟淙赤舌白日照青蠅
嶽麓身猶健星維馭已升
天如遺一老人亦望三登

新安侯夫人俞氏輓詞

蚤兆于凰卜來嬪駟馬車
夫君宜竹帛子舍各詩書
露薤丹旌舉風楊組帳虛
空餘彤管訓他日照鄉閭

次韻甄雲卿晚登浮丘亭

賓筵舊壓三千客
燕榭新高十二城
潑墨雲頭連樹暗
垂絲雨脚過溪生
葛巾羽扇吾身健
雪椀冰甌子句清

從此相從須痛飲故應此事勝公榮

古風上知府秘書二首

神仙絕世立功行聞清都玉符賜長生籙雲遊紫虛雞
犬爾何知偶舐藥鼎餘身輕亦仙去罡風與之俱俯視
舊籬落眇莽如積蘇非無鳳與麟終然侶蟲魚微物豈
有命政爾謝泥塗時哉適丁是邂逅真良圖

大鵬上扶搖南溟聒天沸斥鷃有羽翼意滿蓬蒿裏不
如附驥蠅掣電抹荆薊誰云極么麼俛仰且萬里向來
庭戶間決起不踰咫飄飄托方便意氣乃如此物生未
可料旦暮倘逢世君看功名場得失一交臂

拄笏亭晚望

林泉隨處有清涼山繞闌干客自忙溪雨不飛虹尚飲
亂蟬高柳滿斜陽

乳灘

徽嚴之間灘如竹節
乳灘之險居第一

清溪可怖亦可喜造化於人真虐戲轟雷捲雪鬢成絲
一擲平生來此試險絕無雙是乳灘舟如滾石下高山
畫樓正倚黃昏雨豈識江間行路難

浮丘亭

知郡秘書新作以望黃山有浮丘
容成峰浮丘公容成子之所遊也

黟山鬱律神仙宅三十六峰雷雨隔碧城欄檻偃雙旌
笑挹浮丘為坐客巖扉無鎖晝長開紫雲明滅多樓臺
雲中仙馭參差是肯為使君乘興來西崑巉絕不可至
東望蓬萊愁弱水誰知芳草徧天涯玉京只在珠簾底

他年麟閣上清空却訪舊遊尋赤松我亦從公負丹鼎

來斲砂牀汲湯井朱砂峰溫泉皆在黃山黥山即黃山

風月堂章倅新作洪守名而記之

天風無邊吹海月景入溪山更奇絕太守文章別乘賢
平生付與金杯滑門闌我亦似彭宣想聞橫玉叫蒼煙
讀碑索句仍投轄誰是揚州控鶴仙

寄贈泉石使李元直入覲

漢圖昔中天百六啓真主當時鄧高密徒步赴光武諸
公上雲臺一葉渺湘浦聲名三十年玉氣貫晴宇向來
宣室問天語道舊故不圖太平日復見起兵簿雙旌真
侯服三節臨江滸垂欲大用公少駐議園府人言山澤

官底用廟廊具果聞一乘傳已踵追鋒去翔鳳覽輝來
風采照鴛鷺平生經濟心十不一二吐茲行公勿遜安
國如鼎呂

休寧

南街豪郡城東圃壓州宅誰云沸鑊地氣象不偏仄林
園富瓜筍堂密美杉柏山醪極可人溪女能醉客吳子
邑中彥毫端萬人敵傳杯相勞苦不覺東方白吳益恭豪士也

祁門

石梁平波心金刹駕巖腹溪藤卷霜繒山骨琢紫玉東
堂有嘉名窈窕窓紗綠落花埽無迹蕉葉森似東主人
甚愛客挽袖語陸續衝雨出門去役役媿童僕

靈山口

陵高類登天斗下劇窺井衡從十里近底用許多嶺秋
雨釀春泥掀淖力扛鼎僕夫負隅哭邂逅憂性命舊嗤
子猷狂夜半槳歸艇方知興盡處頃步令人瘦

浮梁

大灘石如林小灘石如枿微生拋擲過兩槳若將割一
灘復一灘食頃經七八崿嶇幸脫免已足凋鬢髮我家
五湖船鏡面貼天闊行迷勿浪遠歸歟泛花月

番陽湖

淒悲鴻雁來泱泱魚龍蟄雷霆一鼓罷星斗萬里濕波
翻漁火碎月落村春急折葦已紛披衰楊尚僵立長年

畏簡書今夕念簞笠江湖有佳思逆旅百憂集

回黃坦

渥丹楓凋零濃黛柏幽獨畦稻晚已黃陂草秋重綠平
遠一橫看浩蕩供醉日落帆金碧溪嘶馬錦繡谷世界
真莊嚴造物極不俗向非來遠遊那有此奇矚

桑嶺

回腸山百盤揮手天一握俯驚危棧穿仰詫飛石落挽
輿如挽舟絕叫斷雙笳怪蔓纏枯槎瘠草被幽壑此豈
車馬路誰云強刊鑿人言遠遊好呼來試着脚

天都峰

黃山

維帝有下都作鎮此南國孤撐紫玉樓橫絕太霄碧晶

石湖詩集卷十
熒砂竇紅天矯泉紳白晴雲無盡藏竟日裊幽石諸峰
三十五離立侍傍側會稽眇小哉請議職方籍

溫泉

黃山朱砂峰下

砂牀毓靈源石液漱和氣鬱攸甌常蒸鬱沸鼎百沸人
生本無垢安用滌腸胃一瓢灑清肥回首謝羅爵山深
人跡罕政以遠為貴君看華清池談者至今諱

石湖居士詩集卷七

石湖居士詩集卷八

伏聞知府祕書欲取小杜桐廬詩語以見花名
堂成大記東坡送鄭戶曹詩云蕩蕩清河孺黃
樓我所開遲君為坐客新詩出瓊瑰樓成君已
去人事固多乖此段大類今日成大行且受代
計梅開堂成歸舟已下南浦欲為坐客不可得
懷不能已請先為公賦之

使君來煖東堂席又見堂前花信息小白猶封竹外枝
微黃已點眉間色山城十月如春臺聞有細書天上來
說與橫斜應早計不須更待雪花催

知府祕書遣帳下持新詩追路贈行輒次韻寄

上

冷雲去仍來凍雨落還歇平明一篙漲珍重送船發端
成南溪泛寧復東堂謁何時公三日請澤看山笏恩勤
一未報終古銘肌骨幡幡跡雖遠耿耿心不沒門闌如
水波永印此孤月

寄上鄙句之明日舟次梅口南枝已有春意復

次知府祕書贈行高韻

晏溫解船去暮夜檣船歇橫斜隘梅村玉蓓粲將發城
中三輔豪指日承明謁高懷妙康濟未試君前笏周南
又小春微溫入花骨我瞻浮丘亭山高瘖柄沒飛鳥正
飄蕩空繞南枝月

晞真閣留別方道士賓實

東山西山雙袖舞中有清宮蟠萬礎雲橫朱閣碧梧寒
風埽石壇蒼檜古道入賓實其姓方來從何許今幾霜
誅蒿仆蓬殿突兀玉華紫氣騰真香胸竒腹憤無人識
我獨相從似疇昔時時苦語見鍼砭邂逅天涯得三益
明朝歸客上歸艎重到晞真計渺茫只有雙魚相問訊
歙江之水通吳江

程助教遠餞求詩

殘山剩水帶離亭送客煩君遠作程直欲明年擊吳榜
白沙翠竹是柴荆

次伯安推官贈別韻

交情彌歲竟忽忽短棹歸尋一畝宮塞責文書容我懶
及時盃酒賴君同披雲峰頂城頭月攬秀堂前扇裏風
千里音書慰離索莫言天遠費鱗鴻

次景琳錄事贈別韻

放船鳴櫓便秦吳送別空煩長者車宿霧鎖山常羃羃
斷雲將雨忽踈踈高城五嶺花深處短棹三江木落初
賴得溪流通尺素蒲根仍有一雙魚

次黃必先主簿同年贈別韻二首

當年仗外揖高標繡鞵蘆鞭寶馬驕瓊苑天香飄合坐
碧城山色照同僚思歸意決吾張翰贈別情深子繞朝
鱉斷魚梁從此去他年書札墮煙霄

山郭官閒得爛遊彌年還往話綢繆西園剝栗催奴課
東院尋梅勸客留皆簿廳故事筆下修鋒千首富談間和氣
兩眉浮別來悵望何時見謾上重城謾上樓

次胡經仲知丞贈別韻

先生有道抗浮雲拄頰看山意最真霜鬢不堪瘠首疾
翠蛾常作捧心顰官如斯立藍田小家似淵明粟里貧
俯仰別來莫莢換祇今誰與話情親經仲與侍兒皆多病又不樂贊邑賦

歸去來詞

次諸葛伯山瞻軍贈別韻

歎維羣山圍漫仕富英傑清標照人寒玉筍森積雪嗟
余獨委瑣無用等木屑又如道傍李味苦不堪折歸舟

坐成泛去馬亦已刷三年風波險盡付一笑閱惟君同
懷抱各坐天機拙我家鷗夷子竹帛照吳越雲仍無肖
似頰首媿前哲若家卧龍公事業管蕭埒期君踵祖武
勿惜兒女別言狂舉白浮醉倒霜松折

次韻樂先生除夜三絕

團蒲曲几坐成癡北看南觀恍是非道眼已空詩眼在
梅花欲動雪花稀

天邊客裏五迎冬爭信還鄉似寓公人事都非城郭是
獨憐雞犬識新豐

牀頭曆日鬢絲絲懶倦慵吟守歲詩宜入新年須吉利
明朝把筆寫門楣

次韻唐幼度客中幼度相別數年復會於錢塘

湖上

西湖冰泮綠生鱗料峭東風欲中人花片不禁寒食雨
鬢絲猶那湧金春江山契闊詩情在京洛追隨客夢新
喚取歌聲不愁思爲君吹水引盃頻

客中呈幼度

手板頭銜意已慵墨池書枕興無窮釀泥深巷五更雨
吹酒小樓三面風草色有無春最好客心去住水長東
今朝合有家書到昨夜燈花綴玉蟲

奠唐少梁晉仲兄弟墓下

當年連璧氣如蜺人許躋攀九列齊黃壤一時埋玉樹

石湖詩集卷八
青雲何處用丹梯生平書札頻雙鯉歲晚交情但隻雞
眼底傷心難制淚寧論宿草已萋萋

鎮東行送湯丞相帥紹興

吳波鱗鱗越山紫鎮東旌旆東風裏前驅傳道相君來
一夜鑑湖春漲起鑑湖如鑑涵空明相君出處如湖清
十年勲業泰山重五鼎富貴浮雲輕人言公如裴相國
綠野堂高貯風月我獨願公如子牟身在江湖心魏闕
浯溪有石高嵯峨公方東征如此何丁寧湖水莫斷渡
早晚歸來絕江去

水月菴謁現老不值

有客叩巖扃無人管送迎片雲間出岫水月自空明

次韻邊公辨

錯落參旗冒竹梢柴荆臨水閉蓬蒿春風吹曉玉蟾墮
穠露洗空銀漢高雙鵲繞枝應也倦一蛩吟壁已能豪
新秋只合添詩興莫學潘郎歎二毛

中秋無月復次韻

屋山從捲杜陵茅門徑慵芟仲蔚蒿澹澹白虹風暈壯
紛紛蒼狗雨雲高凌空累筋仙無術半夜撞鐘句謾豪
枵腹題詩將底用真成兔角與龜毛

公辨用前韻見贈復次韻

先生筆力玉山鼇氣壓明堂一柱蒿雪椀滌毫詞絕妙
朱絃縮瑟調彌高心兵不起無三粲坐客常多似四豪

喜有過從南北巷蘇蘭薪桂滄溪毛

公辨再贈復次韻

書生活計極蕭騷燭火微明似束蒿
犬子地寒徒壁立元龍身懶謾樓高
筆端未辦誇三絕酒裏猶能埽二豪
又向詩壇靳借一強磨鉛鈍齒吹毛

送施元光赴江西幕府

鎮南旌旆照江臯入幕如今客最高
月暗秋城稀擊柝雲飛朝棟賸揮毫
長亭酒盡歌三疊半夜溪深雨一篙
莫戀陽關更西路九關歸路踏金鰲

次韻林子章阻淺留滯

客行端似未歸雲指點璿杓幾易辰
喜有風花黃作暈

似聞溪漲綠生鱗我從走俗言無味
君已鳴文筆有神繡段炳然空辱贈
急緇緹襲埽蛛塵

次韻馬少伊木犀

月窟飛來露已涼斷無塵格惹蜂黃
纖纖綠裏排金粟何處能容九里香

水尾山腰樹影蒼一天風露不供香
誰家鏡裏能消得付與詩人古錦囊

密密嬌黃侍翠輿避風遮日小扶踈
畫闌想見懸秋晚無限宮香總不如

林夫人挽詞

黃中之妹知書

翰墨門闌正巋然故應婉婉亦儒先
與聞古學三千禮

石湖詩集卷八
能誦家書四百篇卜協媯姜占永世夢呼辰已識週年
班姬合有遺文在後日從容訪孟堅

李仲鎮懶窩

求名當着鞭訪道亦重趼二邊俱不住三昧不如懶向
來南嶽師自謂極蕭散收涕且無緒客至那可欸爭如
懶窩高門外轍常滿殊不妨嘯歌秉燭苦夜短天寒雪
欲花屋角黃雲晚徑須煩二妙對洗玻璃盞

次韻陳季陵寺丞求歛石眉子硯

金星熒熒眉子綠婺源琢石如琢玉寶玩何曾抹枵腹
但愛文君遠山蹙丈人筆陣森五兵書品入妙仍詩名
我有陂陀天海樣與公文字俱金聲臬盧一擲不須呼

況敢定價論車渠只煩將到粧臺下試比何如京兆畫

次韻季陵貢院新晴

鎖闈令嚴深復深五星簾幕晴若陰澹雲微月謾清夜
短檠政自關人心看燈作暈生睡色江南行處夢不隔
覺來快讀新晴篇恍然寘我鶯花前徑欲觴公後堂酒
倘煩春杉小垂手

次韻周子充正字館中緋碧兩桃花

碧城香霧赤城霞深出劉郎未見花憑仗天風扶絳節
爲招萼綠過羊家

明日子充折贈次韻謝之

海上三山冠綵霞六時高會雨天花步虛聲裏隨風下

吹落尋常百姓家

明日大雨復折贈再次韻

一天雲葉翳朝霞風卷泥沾不惜花羣玉山高春好在
人間煙雨暗千家

張恭甫正字折贈館中碧桃因次子充韻

次年

滿枝晴雪照青霞舊識桃源暈碧花俯仰京塵隔年夢
東風猶認故人家

雨中報謁呈劉韶美侍郎

花落滿城雨雨餘雲重陰驅車有底急巷泥三尺深平
生黃篋舫漁榔有清音斗升得苦相懷刺衝愁霖歸來
掩關卧一枕直兼金作詩詫比鄰幸勿譏褊心

雨中集水月

獻之今年不堪暑天亦相憐病良苦明便中秋法合涼
夜半行雲曉行雨蘄州竹簟清如水飢蚊倔强猶鳴聲
下牀蚤喜衣裳健出門更覺山川明曳屐扶藜尋水月
不惜垂垂巾角折竹間松下已淒然却要芳樽生煖熱

送洪景盧內翰使虜二首

金章玉色照離亭戰伐和親決此行國有威靈雙節重
家傳忠義一身輕平生海內文場伯今日胸中武庫兵

萬里往來公有相淮瀆陰德貫神明

近日兩淮戰地掩骼公之請也

檄到中原殺氣銷穹廬那敢說天驕今年蕃始來和漢
即日燕當遠徙遼北土未乾遺老淚西陵應望孝孫朝

著鞭往矣功名會麟閣丹青上九霄

次韻嚴子文旅中見贈

杯中疇昔共江天傾座新詩報警聯海浦寸心空共月
京華雙鬢各凋年交情敢說同方友句法甘從弟子負
有意數從文字飲何須爭着祖生鞭

次韻子文客舍小樓

客裏仍攜一束書閉門虹氣自凌虛未聞光範延珠履
誰向甘泉從玉車散盡生涯千荅布收將文價百車渠
淹留且結西湖夏同到秋風賦遂初

次韻劉韶美大風雨壞門屋

雲煙揮翰墨池翻細縹如山晝掩關已許六丁收散落

只愁雷電費牆藩

洪景盧內翰使還入境以詩迓之

玉帛干戈洵並馳孤臣叱馭觸危機關山無極申舟去
天地有情蘇武歸漢月凌秋隨使節胡塵捲暑避征衣
國人渴望公顏色爲報褰帷入帝畿

寄題向撫州采菊亭

一葉起秋色衆綠凋歲華耿耿霜露側餘此黃金葩西
風滿天地孤芳照塵沙殷勤開小築花氣日夕嘉落英
楚纍手東籬陶令家兩窮偶寓意豈必真愛花不如亭
中人一笑了天涯采采勿虛度門前欲高牙

古風二首上湯丞相

抱瑟游孔門豈識宮與商古曲一再行乃雜巴人倡知
音顧之笑解絃爲更張歸來掩關卧冰炭交愁腸平生
桑濮手未省歌虞唐明發理朱絲復登君子堂遺音入
三歎山高水湯湯
空山學仙子窮年卧巖扃煮石不得飽秋鬢蒼已星道
逢紫霄翁示我餐霞經采采晨之華滌濯腐與腥向來
役薪水終然槁柴荆跪謝起再拜飄飄蛻蟬輕飛升那
敢學倘許學長生

冷泉亭放水

古苔危磴著枯藜脚底翻濤洶欲飛九陌倦遊那有此
從教驚雪濺塵衣

九月十日南山見梅

五斗留連首屢迴來尋南澗濯塵埃春風直恐淵明去
借與橫斜對菊開

送汪聖錫侍郎帥福唐

承明纔入又南州重見旌旗照柁樓道義平生無捷徑
風波隨處有虛舟如公未可違文石稽古何妨欠碧油
我亦登門煩著錄此行無力爲王留

送王純白郎中赴閩漕

聲利場中百戰鏖今誰勇退似公豪緩尋南粵千山路
先破西興百尺濤平日曼容嫌祿厚他年文本歎官高
才名政爾歸安往富貴追蹤未可逃

純白先君平生約
官至正郎而休卒

踐言故純白為兵部
便丐去以承其志

長至日與同舍遊北山

歲晚山同色湖平霧不收
寒雲低閣雪佳節靜供愁
竹柏森嚴立蒲荷索莫休
瘦筇知脚力政爾耐清遊

石湖居士詩集卷八

石湖居士詩集卷九

次韻尹少稷察院九宮壇齋宿

草草馳三里蕭蕭共一餐
吏方繇禮絕公自將詩壇
隙月窺牀近窓風刮坐寒
鴉鳴未忍散端為四并難

冬祠太乙六言四首

三一舊傳神呪十神今濟時
艱願挽靈旗北指為君直
擣陰山

月色朧明碧瓦蠟煙浮動黃簾
罨騎鸞輪欲下一天飛
霰纖纖

雲木栖烏未動風庭警鶴先鳴
殘夜百靈夙駕人間鼻
息雷驚

行道羽衣縹緲捲班玉珮冬瓏回首金鋪獸面步虛聲
在天風

次韻李子永雪中長句

黃昏苦寒烏鳥稀吹沙走石交橫飛布衾如鐵復似水
夢想東風來解圍豈知天地有奇事夜半窓紙生光輝
兜羅寶界佛所現冥凌不敢專璿璣開門倚杖眩一色
迴立此世空無依少年行樂况尚記瑶林珠樹中成蹊
犬驕鷹俊馬蹄快狡穴未盡須窮追湖海粗豪今豈在
但憶鳴哮如餓鴟北鄰亦復淡生活要我忍寒吟此詩
手龜筆退不可捉墨泓齟齬水生衣

次韻子永見贈建除體

建子玉杓直黃昏月如霜除道啓柴扃客來巾履忙滿
炷寒缸油共此書檠光平生卜鄰願何意登我堂定交
吾豈敢南榮慚伯陽執手道古作遺篇記河梁破窓風
鳴悲孤客多慨傷危腸不抹飢我詩安得昌成章類村
歌但可侶牛羊收功翰墨藪微子誰能良開卷得雅音
玉鑾導旂常閉戶坐相念雪深梅暗香

與胡經仲陳朋元遊照山堂梅數百株盛開

九陌緇塵滿客襟錢塘門外有園林胡牀佳處梅無限
酒旆垂邊柳未深晴日煖風千里日殘山剩水一人心
元方伯始皆吾黨解后清遊直萬金

次韻胡邦衡祕監

石海言集卷九
斯言向來立千古敢疵瑕有命孤蓬轉何心勁箭加人
窮名滿世天定客還家回首冥恩怨虛空不著花

三月四日驟煖

日脚融晴晚氣暄睡餘初覺薄羅便如何柳絮沾泥處
煖似槐陰轉午天

久雨地濕

汗礎經旬未肯乾破窓隨處有蝸涎祇今不耐春陰得
想見黃梅細雨天

晝錦行送陳福公判信州

漢家麟閣多王侯冠佩相望經幾秋晝錦聲名兩榮耀
惟有信州如相州國南門頭折楊柳借問江津垂白叟

住在行都四十年曾見歸舟似公否人言公與赤松期
颯車羽輪來何時雲出雲歸俱是道苦學赤松還未妙
君不見補陀大士海復山隨喜却來觀世間

送張真甫中書奉祠歸蜀

種成桃李恰新陰忽憶家山叢桂林客路莫嫌歸計拙
春江爭似駭機深一封朝奏鈞天夢萬里江行魏闕心
後日還朝飽風露黑頭應有雪絲侵

送周子充左史奉祠歸廬陵

黃鵠飄然下九關江船載月客俱還名高豈是孤臣願
身退聊開壯士顏傾蓋當年真旦暮沾巾明日有河山
後期淹速都難料相對猶憐鬢未斑

送陳天子大監同年使閩

春關十載記英遊
蚤喜時才近采旒
夷路着鞭方逸駕
急流回首忽扁舟
雲霄正穩君猶去
塵土無邊我合休
問訊後車容客否
茶山荔浦看南州

送陸務觀編修監鎮江郡歸會稽待闕

寶馬天街路
煙篷海浦心
非關愛京口
自是憶山陰
高興餘飛動
孤忠有照臨
浮雲付舒卷
知子道根深
見說雲門好
全家住翠微
京塵成歲晚
江雨送人歸
邊鎖風雷動
軍書日夜飛
功名袖中手
世事巧相違

送李仲鎮宰溧陽

相逢已歎十年遲
冷淡貧交又語離
玉筍換班通籍後

黃梅催雨送帆時
月巖家世猶為縣
仲鎮方叔孫也
金瀨溪山

好賦詩喚起酸寒孟
東野倒流三峽洗餘悲

送吳元茂丞浦江

玉筍翻乘縣佐車
飄然不肯待新除
才名已被人爭說
官簿何妨計小踈
憶昨西湖同我載
從今南浦望君書
遙知斂板趨風後
始覺丞哉果負予

雪晴呈子永

碧空無處泊
同雲晴入荒園
鳥雀馴冰面
小風池欲動
雪邊濃日瓦
如薰塵容俗狀長
為客冷藥踈枝又作去聲
春詩卷豈能生煖熱
犯寒聊復惱比鄰

次韻子永雪後見贈

雪飯待伴半陰晴竟日擔冰溜雨聲九陌泥乾塵未動
南山石露塔猶明稍聞吉語占農事便覺歸心勝宦情
想得秣田來歲好瓦盆加釀灌愁城

次韻郊祀慶成

帝德重堯緒天心與舜禋慶期符後甲元日際初辛土
緯扶南極旄胡拱北辰律諧風自良衡正斗垂寅桂燎
靈宮曉蕭脂太室晨百神森壁壘萬衛密鈎陳日月青
旂色雷霆玉輅塵洗兵銀漢水收雪紫壇春天步臨黃
道仙班像玉宸陶匏宗素樸琮璧慕精純祕祝哀時對
高旂歛下賓金鐘鳴傑簾朱火蕙芳薪日麗雞竿矗天
旋鳳律新端門敷錫後六合共細縕

從巨濟乞蠟梅

寂寥人在曉雞窓苦憶花前續斷腸全樹折來應不惜
君家真色自生香

次韻朋元賣花處見梅

煙濃日淡不多寒擔上看花雪作團想得竹邊春已暗
明朝走馬過溪看

與正夫朋元遊陳侍御園

沙際春風捲物華意行聊復到君家年年我是曾來客
處處梅皆舊識花官減不妨詩事業地寒猶辦醉生涯
城中馬上那知此塵滿長裾席帽斜

正月十四日雨中與正夫朋元小集夜歸

燈市淒清燈火稀雨中風帽笑歸遲月明想在雲堆處
客醉都忘馬滑時老去樽前花隔霧春來句裏鬢成絲
浮生不了悲歡事作劇兒童總未知

次韻子永夜雨

辦作長愁客工哦苦雨吟挑燈今夕意歌枕故園心漏
屋踈踈滴空檐細細斟相過巷南北屐齒怕泥深

次韻朋元遊王氏園

聯翩步履翠微間回首紅塵自鮮歡捲地雨添千澗急
擁門雲鎖兩山盤絕憐茶笋能留客仍喜蛙聲不在官
雪白楊梅消息未重來應至麥秋寒

遊靈石山寺

寺門頰壁有仙人顏禹李甲蕭筠
三人題詩方運筆時伸臂丈餘闊

人驚報王僧
回顧已失矣

西湖富清麗城府塵事并我獨數能來不負雙眼明騷
騷殘絮罷颭颭新荷成歲華日夜好遊子能無情午陰
釀初暑稍喜巾袂輕小風吹鬢毛將我入松聲崖寺金
碧暗石泉肝膽清壽藟萬蛟舞靈峰雙髻撐仙人昔來
游筆墨上朱萐舉臂尋丈高聊得兒童驚老矣謝狡獪
題詩記吾曾

次韻李器之編修靈石山萬歲藤歌

君不見東林怪蔓之詩三百年字如金繩鐵索相糾纏
不如李侯靈石句筆陣壓倒長城堅藤陰詩律兩秀發
此段竒事今無前吾聞草木未有不黃落雨荒霜倒相

後先緜緜紫萼天所壽風雨不動常蒼然
堅姿絕鄰傲一所深本無極融三泉
騰蚪舞蛟矯欲去流蘇絡帶翩如仙
班荆芘賴得吾黨酌泉共吸杯中天
詩成一斗屬太白擘牋揮埽如雲煙
北門西掖君自有坐擁紅藥然金蓮
山腰澗底莫濡滯早晚天風吹蛺蟬

次韻正夫遊王園會者六人

丘園窈窕復崎嶇草木生香景倍殊
花下百杯齊物我雲邊一眼盡江湖
不知朱戶趨趨者能勝青山放浪無
六逸蕭然真可畫爲君題作竹溪圖

四月五日集陳園照山堂

尋壑經丘到此堂官閑聊作送春忙
短籬水面殘紅滿

團扇風前衆綠香盡捲簾旌延竹色深斟杯酒納山光
洞門無鎖城門近轉午雞啼日正長

題寶林寺可賦軒

十里山行雜市聲道傍無處濯塵纓
寶林寺裏逢修竹方有詩情約略生

次韻朋元久雨

誰釀愁露玉宇間都緣梅子要攔斑
騰騰困思午猶夢擾擾奔雲風未還
休問滿城騎馬滑不妨長日閉門閑
今朝晴色熹微似乾鵲飛來語屋山

韓無咎檢詳出示所賦陳季陵戶部巫山圖詩
仰窺高作歎息彌襟余嘗攷宋玉談朝雲事漫

石澗言集卷九
稱先王時本無據依及襄王夢之命玉爲賦但
云顛顏怒以自持曾不可乎犯干後世弗察一
切溷以媒語曹子建賦宓妃亦感此而作此嘲
誰當解者輒用此意次韻和呈以資撫掌

瑤姬家山高插天碧叢竒秀古未傳向來題目經楚客
名字徑度岷峨前是邪非邪莽誰識喬林古廟常秋色
暮去行雨朝行雲翠帷瑤席知何人峽船一息且千里
五兩竿頭見旛尾仰窺仙館至今疑行人問訊居人指
千年遺恨何當申陽臺愁絕如荒村高唐賦裏人如畫
玉色顛顏元不嫁後來飢客眼長寒浪傳樂府吹復彈
此事牽連到溫洛更憐塵鞮有無間君不見天孫住在

銀濤許塵間猶作兒女語公家春風錦瑟傍莫爲此圖
虛斷腸

次韻樂先生吳中見寄八首

金鶴飛來尺素通新詩字字挾光風三年湖海關心處
都在先生句子中

官居門巷果園西桃李成蹊杏壓枝如許年芳忙裏過
斬新今日試題詩

墓林棲鳥各深枝燕子知巢觸幔飛倘有三椽今已去
不關五斗解忘歸

懶不看書似姓邊夢魂飛繞白鷗前須知席帽衝塵出
不似篷窓聽雨眠

送春濛雨漲蘋灘荷葉田田柳絮闌想見垂虹三萬頃
拍天湖水釣絲寒

知從了義透音聞古井無波豈更渾便好一坑埋衆妙
何須六結解諸根

幾多螻蟻與王侯往古來今共一丘遮莫功名掀宇宙
百年兩角寄蝸牛

粟囊聊復寄三餐埋沒緇塵懶濯冠紅紫百般紛過眼
鄉山歲晚自蒼官

胡長民監元挽詞

太學蘼鹽舊中吳翰墨聲關山題柱筆風露讀書檠夜
雨綠荷破孤墳丹桂生空將擅場手往記玉樓成

次韻朋元正夫夜飲

歌豪仍作家奕勝豈微幸莫嗤老非少乃尚可以逞玉
瓶引杯長政爾寒漏永二三文章公共此銀燭影陳卿
得秀句劉郎一笑領羸驂兀殘夢乘墜恍難省曉枕訶
更潮俱墮無何境

次韻趙正之同年客中

清班合列大明宮自要牛刀試一同踏徧巉巖吾道在
莫將尋尺較窮通

羶車席帽各青春花下驂騑一闋塵離合飄零十霜露
咸陽客舍有詩人

可憐山縣五斤手不識王孫八斗才君自扶搖有霄漢

從渠蝸鷄舞蒿萊

次韻陳季鄰戶部旦過菴

宦遊觸處似懸匏北嶽南山想獻嘲拍手百年休鑄鐵
蓋頭一把暫誅茅玉京歲晚梧桐落水國霜清橘柚包
飛錫已隨歸夢去何人頂上鵲成巢

朋元不赴湖上觀雪之集明日余召試玉堂見
寄二絕次其韻

雪溪清興未渠闌晚上西樓帶月看公子自貪低唱酒
肯來同對玉峰寒

文場寧復鬢霜宜白玉堂前雪霽時不惜狂言棖忌諱
秃毫冰硯竟無竒

石湖居士詩集卷九

石湖居士詩集卷十

翰林學士何公溥輓詞以下館中作

盛際羣多士諸儒遜一賢名場魁淡墨官簿到花磚地
近行知政天高不假年書生稽古力何必盡台躔

送洪內翰使虜二首

郊廟熙成霈率濱罪如猾夏亦維新邊烽已却來南虜
使節猶煩第一人遙想穹廬占漢月便呼重譯布唐春
單于若問公家世說與麒麟畫老臣

峨冠方侍玉輿香公此侍祠郊禋雙節飄然照大荒正

倚先生令趙重寧容驕子詫胡強天教忠信行區脫人
許功名上太常試卜和羹知未晚歸來煙雨正梅黃

次韻趙德莊吏部休沐

窈窕新堂好委蛇夜直還遙知歎帽髮正奈捲簾山門
外客姑去窓前人對閑誰能烏帽底塵土浣朱顏

次韻王夷仲正字同遊成氏園

秀巖堂上玉東西把酒登臨望眼迷天宇四垂粘地近
海山一抹帶潮低絕知客好無塵事聊記吾曾有醉題
倚賴羣仙聯姓字他年誰敢一抔泥

是日諸公
令余題壁

王季海祕監再賦成園復次韻

雲莊風榭對東西清暑光陰近竹迷一斗正緣詩興盡
兩眉休爲客愁低披開豹霧尋陳迹掃盡蛛塵看舊題
健往莫愁騎馬滑闌珊梅雨不成泥

春晚偶題

寂寥春事冷於秋雨打風吹斷送休點檢梨花成一夢
蘸紅新綠滿枝頭

倪文舉奉常將歸東林出示綺川西溪二賦輒
賦長句爲謝且以贈行

綺川亭上凌雲賦人在回仙舊遊處誰教書劍走長安
荻月霜楓等閑度朱門不炙釣竿手萬卷難供折腰具
偶然把筯憶蓴羹乞得閑官徑呼渡江漲橋頭有渡船
船頭歷歷東林路雲煙如畫水如天笑憶紅塵問良苦
我亦吳松一釣舟蟹舍漂搖幾風雨因君賦裏說江湖
破帽寒驢明亦去雞犬相聞望可見鷗鷺同盟心亦許

相過得得欵溪門雪夜前村聽鳴榔

送吳智叔檢詳直中祕使閩

抗章襪被豈公難已說高風立懦頑客路莫嫌河畔草
直廬須愛道家山秋生蓮浦船初泛春滿茶溪騎趣還
却訪故人西府舊定煩書札墮田間

楊君居士挽詞

孝至蘭陔茂身脩梓里恭名場兒中鵠媼黨壻乘龍駒
隙驚年運蟬媽有慶鍾幽光定無憾豐刻妙形容

送周畏知司直歸上饒待次

漫郎西笑費三年故業新聞腹果然長塵劇談抽繭緒
短檠細字綴蠶眠頻驚陸海風波夢未了京塵粥飯緣

後日重來應訪舊五湖煙浪有漁船

次韻魏端仁感懷俳諧體

浪學騷人賦遠游大千何事不悠悠酒邊點檢顏紅在
鏡裏端詳鬢雪羞過眼浮雲翻覆易曲肱短夢破除休
孤煙落日冥鴻去心更冥鴻最上頭

次韻李子永梅村散策圖

光風先放越溪春蕭散尋詩索笑人藜杖前頭春浩蕩
三生應是主林神

太師陳文恭公挽詞

日者更皇化公來輔聖能無心殊轍混不作衆波澄舉
國材真相他年了中興天如遺一老人亦望三登

候火朝連夕籌帷決縱擒一江遮虜障千古殺胡林
日黃河誓浮雲綠野心身名兩無憾天壤獨清音
聖父咨當璧元臣預斷金玉衡賓舜日黃屋遂堯心
國定功無迹身閑病已深旌忠有謨訓碑榜照來今
趣召單車至驚傳兩鬢凋傾城迎國老即日走天驕
夢已商人真身猶漢相朝古來賢達意生滅兩消搖

送陳朋元赴溧陽

九畹滋蘭靜自芳啁啾誰復認孤凰風流歲晚嫌杯酒
文字功深得鬢霜斂板君猶能俛仰倚樓吾敢計行藏
船開便作江南客天色無情更鴈行

次韻韓無咎右司上巳泛湖

休沐辰良不待晴徑稱閑客此閑行春衫欺雨任教冷
病眼得山元自明抹黛濃嵐圍坐晚揉藍新綠沒篙清
棲鴉未到催歸去想被東風笑薄情

太保節使趙公挽詞

密

結髮險艱會捐軀跳盪功鬢凋猶陞戟心在惜弢弓劍
履三槐次樓臺四壁中諸郎競文武不朽是清風

太宜人程氏挽詞

程泰之妻
部之母

我昔官黥歎人傳女訓芳尊章宜小婦孫子壽高堂風
木真無定冰魚已不嘗遙憐霜露感何必薤歌傷
捧檄三牲養稱觴百歲期身猶孺子泣世已隙駒馳吉
夢青衣卜豐碑黃綃辭佳城有奇事應足洗餘悲

石湖言集卷一
與王夷仲檢討祀社

殘夜露如雨秋氣淒以分牆西雲正黑跼跼墮金盆良
耜酢西成豆籩菊芳芬去年歲大侵小家甑生塵疫鬼
投其熾虐甚溺與焚皇慈降清問下招離散魂調糜鬻
藥石黑簿回春溫德馨典神天秋稼如雲屯社公亦塞
責醉此豐年樽神兮率舊職爲國憂元元自今歲其有
驅癘蒼煙根

王園官舍睡起

公退閉閤卧官居如淨坊屋角斷虹飲日西楊柳黃客
來東我帶客去書滿牀睡覺有忙事煮茶翻斷香

古風酬胡元之

以下白塔
新居作

拂我膝上琴當客清風襟我琴無軫絃不和願借之子
調其音美人一笑千黃金彈作江岸花木深下有同隊
之游魚上有同聲之鳴禽琴聲一疊一歎息江花江草
無終極

題徑山凌霄菴

峰頭非塵寰一舍誰所芟軒眉玉霄近按指沙界豁萬
山紛累塊衆水眇聚沫來雲觸石迴去鳥墮煙沒向無
超俗緣茲路詎可越偕行木上坐同我證解脫

徑山傾蓋亭

萬杉離立翠雲幢娟娟稀聞晚吹香山下行人塵撲面
誰知世界有清涼

題徑山寺樓

浴日蒼茫水捫星縹緲樓神光來燭夜壽木不知秋海
內五峰秀天涯雙徑遊愛山吾欲住衰疾懶乘流

丙戌閏七月九日與王必大登姑蘇臺招王浚

朋陳淵叔耿時舉避暑次時舉韻

始賀火流西還嗟斗斜閏餘暑猶強顏新涼頗難進燥
剛渴欲坼焦卷禿如燼炎官扶日轂輝赫不停運登臨
有高臺勇往得三俊仍將王郎子飛步凌劫仞風從噫
氣來雲作壤山陣鄉如垂頭魚忽已蟄蟲振空明晚逾
清更要孤月印書生乃易與俛仰更喜愠憑闌天爲高
舉酒山欲近竒書鐵鉤鎖麗句錦窠暈茲遊我輩獨難

挽軟紅鞞君看籠中鳥寧識咸池韻

淵叔出米元章書蹟甚竒

明日夜雨陡涼復次前韻呈時舉

幽懷青松獨直道黃楊閨懶從襜襜子遮日千主進閉
戶友千載脫簡理秦燼秋熱出意表誰云法天運摧頽
如鍛翻何暇賈餘俊願從青溪仙飛下二千仞撒波嘯
長風塵暑陷其陣茲行病未能喝卧何時振一雨忽破
慳江湖發封印天公如仲尼亦念季路愠團扇未全踈
短檠差可近細字讀蠶眠指眼眩燈暈明當呼我友乘
涼踈游軻賡詩代僕吶非敢翫強韻

七月二日上沙夜泛

困倚船窓看斗斜起來風露滿天涯亭亭宿鷺明菰葉

閃閃涼螢入稻花
月下片雲應夜雨
山根炬火忽人家
江湖處處無窮景
半世紅塵老歲華

浴罷

西城落日半輪明
浴罷衣裳一倍輕
玉宇風來歸鳥急
火雲銷盡綠雲生

寄溧陽陳朋元明府約秋末過之

海內交情兩斷金
一官分袂阻登臨
書來恰值看雲眼
夢往誰知共月心
道義只今無捷徑
溪山依舊有清音
西風滿棹蒲帆飽
秉燭相尋語夜深

次韻耿時舉苦熱

赤日纔低又火雲
巷南街北斷知聞
荷風拂簟昭蘇我

竹月篩窓慰藉君
避暑無竒那避謗
能觴便了莫能文

浮湛放蕩從今始
悔把長裾強沐薰

余家近穿小蓮池
時舉亦種竹簷間

昔為度
暑計

次韻王浚明用時舉苦熱韻見贈

暑窓當午思昏昏
雷起千峰睡不聞
鑠石誰能招楚魄
斲冰我欲訪湘君
年華祇合加餐飯
事業休工刺繡文
賴有兩賢南北巷
歲寒幽谷共蘭薰

李次山自畫兩圖其一泛舟湖山之下小女奴

坐船頭吹笛其一跨驢渡小橋入深谷各題一

絕

船頭月午坐忘歸
不管風鬟露滿衣
橫玉三聲湖起浪

前山應有鵲驚飛

黃塵車馬夢初闌
杳杳騎驢紫翠間
飽識千峰真面目
當年拄笏漫看山

太傅楊和王挽歌詞二首

先廟垂忠烈
孤童侈舊勲
風雲天策府
心膂殿前軍
汴

劉豫以廢石梁之役虜
帳蕩然功無烈於此者

御漸臺
蹙胡騎
罽幕焚人亡
汗青在足以詔無垠
定遠之師
歲與靈光晚
名登甲令芳
剖符山若礪
交戟鬢如霜
半世三槐位
千秋異姓王
哀榮公不憾
人自惜堂堂

少卿直閣鄭公挽歌詞 恭老

今代魁梧老
終身寂寞濱
鬢霜三館直
碑淚五州春
壽

相空壬甲行年竟
巳辰墳丘纔馬鬣
何處著經綸
憶昨登門日
驩傳考室詩
謂公安且吉
何意哭於斯
遺老典刑盡
此邦名教悲
誰能傳耆舊
他日慰吳兒

高景菴讀舊題有感

莓苔風雨舊詩留
十七年前鬢未秋
巖桂拂雲篁竹拱
樹猶如此一搔頭

華山道中

過午曾雲未肯開
煖寒村店竹初灰
蕭蕭林響棠梨戰
晚恐陽山有雨來

送嚴子文通判建康

四海論交賴有子
一日不見真愁予
人誰可與話心曲

天忽遣來同里居懊惱春來不數面丁寧歲晚猶頻書
黑頭屢別那敢惜歎息駸駸霜滿梳

次韻王浚明詠新居木犀

月窟移來有貴名一簾金碧照東榮鼻端入妙睡魔醒
眼底會真詩句生日氣瓏璵無奈醉露華凌亂不勝清
君家傾國何時見淡掃蛾眉撚夕陰

提刑察院王文挽詞

彥光

諭蜀三年戍還吳萬里船雲歸雙節後雪白短檠前百
世春秋傳一丘陽羨田浮生如此了何必更凌煙
日者悲離索公今又眇冥門人辦韓集子舍得韋經此
去念築室空來聞過庭平生無路見終古泣松銘

送關壽卿校書出守簡州

東壁星宮館列仙一麾苦欲近田園宅家但寶千金鑑

臣輩何辭萬里船

壽卿述藝祖寶訓為書以獻多觸貴要者

京洛知心塵鞅

裏江吳攜手暮帆邊聲名如此歸安往日日閭門望眼
穿

頃自吏部郎去國時獨同舍趙友益追路送詩
數月友益得儀真過吳江次元韻招之

東風分袂省西廊袖有明珠照客航道義有情通出處
文章無地著炎涼君今猶把一麾去我敢倦鋤三徑荒
邂逅天涯如夢寐肯來相對話更長

長沙王墓在閩門外

孫伯符

英雄轉眼逐東流百戰工夫土一坏蕎麥茫茫花似雪
牧童吹笛上高丘

次韻孫長文泊姑蘓館

讀書窓下一燈殘忽有詩來爲煖寒聞道扁舟春共載
雪雲雖冷不相干

長文再作復次韻

渚蒲汀蓼得霜殘歸客思家不計寒喜鵲門前人一笑
絕勝風色候長干

次韻耿時舉王直之夜坐

庭葉翻翻鬧燈花粟粟穠關山千里鴈風雨滿城鐘隴
上新登穀江頭舊熄烽今年吾計得安穩讀三冬

次韻徐子禮提舉鶯花亭

并序

秦少游水邊沙外之詞蓋在括蒼監征時所作予至
郡徐子禮提舉按部來過勸予作小亭記少游舊事
又取詞中語名之曰鶯花賦詩六絕而去明年亭成
次韻寄之

灘長石出水鳴隄城郭西頭舊小溪游子斷魂招不得
秋來春草更萋萋

愁邊逢酒却成憎衣帶寬來不自勝煙水蒼茫外沙路
東風何處挂枯藤

壚下三年世路窮蟻封盤馬竟難工千山雖隔日邊夢
猶到平陽池館中

文章光燄照金閨豈是遭逢乏聖時縱有百身那可贖
琳瑯空有萬篇垂

山碧叢叢四打圍煩將舊恨訪黃鸝纈林霜後黃鸝少
須是愁紅萬點時

古藤陰下醉中休誰與低眉唱此愁團扇他年書好句
平生知己識儋州

石湖居士詩集卷十

石湖居士詩集卷十一

己丑五月被召至行在遇周畏知司直和五年

前送周歸弋陽韻見贈復次韻答之以下自處州再至行

在

分袂悠悠爾許年莫嗔蓬鬢兩蕭然酒槽不奈青春老
經笥空供白晝眠暗綠千章新活計軟紅三尺舊塵緣
相逢且作西湖客山繞荷花樣畫船

次韻馬少伊郁舜舉寄示同游石湖詩卷七首

蕪城老蘚不知春忽有柴門月色新芝草琅玕無鎖鑰
自無超俗扣門人

莫問朝歌與棘津浮生惟有一杯春君看百戰功名地

越成吳臺兩窖塵

鏡面波光倒碧峰半湖雲錦萬芙蓉去年蕩槳香風裏
行傍石橋花正濃

紅皺黃團熟暑風甘瓜削玉藕玲瓏身謀已落園丁後
滿帽京塵日正中

兩賢風度藹春陽步履隨風上柳塘綵筆紅牋芳徑裏
句中挾我萬花香

得得來題小隱詩拂香縈柳画船移湖邊好景春猶未
須到秋清月滿時

瀟洒王郎亦勝流今年何事阻清遊當家風味今如此

孤負山陰夜雪舟

王必大獨不赴
二公同遊之約

玉堂寓直

摘文窓戶九霄中岸幘燒香愧老農上直馬歸催下鑰
傳更人唱促鳴鐘金城巖嶂雲千雉碧瓦參差月萬重
骨冷魂清都不夢玉階蕭瑟聽秋蛩

己丑中秋寓宿玉堂聞沈公雅大卿劉正夫戶
部集張園賞月走筆寄之

笑看收雲捲雨忙沉沉宮樹納空光夜長來伴玉堂宿
天近似聞丹桂香鳩鵲樓欄浮瑞氣鳳凰城闕帶新涼
遙知勝絕西園會也憶車公對舉觴

八月二十二日寓直玉堂雨後頓涼

雨意蒸雲暗夕陽濃薰滿院落花香題詩弄筆北窓下

將此工夫報荅涼

次韻荅吳江周縣尉飲垂虹見寄

垂虹亭上角巾傾，鼉怒龍吟醉不聽。
安得對君浮大白，想應嗤我汗新青。
夢魂舞蝶隨春草，時節賓鴻點暮汀。
湖海扁舟須及健，莫教明月照星星。

次韻徐廷獻機宜送自釀石室酒三首

元亮折腰嘻已久，故山應有欲蕪田。
因君辦作送酒客，憶我北窓清晝眠。

清絕仍香如橘露，甘餘小苦似松肪。
官槽重濁那知此，付與街頭白面郎。

一語爲君評石室，三杯便可博涼州。
百年兀兀同渠住，

何處能生半點愁

玉堂寓直曉起書事記直舍老兵語

江湖垂釣手，天漢摘文章。
魂清不得眠，室虛自生光。
曉緯澹天闕，江濤隱胡牀。
傳呼九門開，奔走千官忙。
若若誇組綬，紛紛夢黃梁。
微聞鈴下騶，竊議馬上郎。
但計夢長短，寧論已行藏。

與長文正夫游北山

柳岸松門勝處通，馬蹄踏霧入空濛。
春寒有力欺遊子，天色無情沒斷鴻。
雨脚遠連山脚暗，杏梢斜倚竹梢紅。
馳裘擁鼻吾衰矣，年少猶嫌料峭風。

致政承奉盧君挽詞二首

德華父

泮水橋門識太平歸來霜鬢老柴荆淹中學遠方成傳
谷口名高豈待卿黃壤無情埋玉樹青衫有道勝金籛
襄陽耆舊今蕭索惟有松風到晚清
純孝當年有護持赤眉那敢近姜詩眼看庭玉成名後
身及堂萱未老時湖海青鞵驚斷夢風霜丹旆挂新悲
尊前五客今誰在愁絕廬山十段奇

寓直玉堂拜賜御酒

歸鴉陸續墮宮槐簾幙參差晚不開小雨遂將秋色至
長風時送市聲來近瞻北斗璿璣次猶夢西山翠碧堆
慚愧君恩來甲夜殿頭宣勸紫金杯

送汪仲嘉侍郎使虜分韻得待字

聖人坐明堂洪覆等穹蓋歲頒兩玉節前後歌出塞公
才有廊廟安用試專對要煩第一人鎮撫大荒外嫩寒
欺別酒微月見征旆遙知燕山雪飄灑漢冠佩玉色照
穹廬驕子亦心醉要領一笑得歸來安鼎鼐是時春正
佳湖上花如海清遊不可遲日日樣船待

李翬知縣作亭西湖上余用東坡語名之曰飲

綠遂爲勝槩

芷葺蓮巢喚客遊蘆鞭席帽爲君留未論吹水堪添酒
且要移牀學枕流乍霽却陰梅釀雨暫暄還冷麥催秋
石湖也似西湖好煩向蒼煙問白鷗

草蟲扇

莫嫌絡緯股鳴悲解向寒牕促曉機海眼多花無藉在
顛狂只待學于飛

送汪仲嘉待制奉祠歸四明分韻得論字

丹霄碧海眇高騫厭直承明却自論寶馬十年聽漏箭
扁舟一雨看潮痕侍臣相憶松門遠歸客還憐菊徑存
清潤要非山澤相又煩一札下雲根

魯如晦郎中挽詞二首

術業推游刃功名苦溯洄著鞭孤壯志籌算老竒才星
省龐眉去雲山袖手來知公了時命何必誅餘哀
自古歸來引于今遂隱篇碁燈熒夜觀歌板聒春船陳
迹空華似佳城露草邊寂寥雞黍約望眼一潸然

初約鄰人至石湖以下辛卯自西掖歸吳作

窈窕崿嶇學種園此生丘壑是前緣隔離日上浮天水
當戶山橫匝地煙春入葑田蘆綻筍雨傾沙岸竹垂鞭
荒寒未辦招君醉且吸湖光當酒泉

社日獨坐

海棠雨後沁臙脂楊柳風前撚綠絲香篆結雲深院靜
去年今日燕來時

與周子充侍郎同宿石湖

幽香馥蕙帳清夢安且吉蘿月墮蒼茫松風隱蕭瑟曉
禽啄且鳴喚我起盥櫛鈎窓納雲濤灑灑浴初日金鉦
忽騰上倒景落書帙佳晴有新課曬種催菽秫從今不

得間東臯草過膝

和周子充侍郎見寄樂府戲贈之作

釣海風水急登樓塵霧高不如岸綸巾春船攜小橋芳
草含竒薰光景上東壁桂林那辦此辦作安昌客

壬辰三月十八日石湖花下作

夜飲海棠月朝漱山茶露臞儒槁木形受用侈如許荆
扉隔黃塵誰識花鳥路惟有瘦筇枝共飽園中趣林神
釀餘春政爾美無度葱蘢千萬重芳意未渠暮風香薦
秀色鼎俎謝腥腐雖無稻粱謀捫腹有餘飫

刈麥行

梅花開時我種麥桃李花飛麥叢碧多病經旬不出門

東陂已作黃雲色腰鎌刈熟趁晴歸明朝雨來麥沾泥
犁田待雨插晚稻朝出移秧夜食麩

壬辰天中節赴平江錫燕因懷去年以侍臣攝
事捧御盃殿上賦二小詩

去歲排場德壽宮薰風披拂酒鱗紅小臣供奉金龍醮
親到虛皇玉座東
天中繖動玉輿來萬歲三聲徹九街想見牙牀當殿過
舜裳雲委拜堯階

壬辰七月十六日侵晨真率會石湖路中書事
白葛烏紗稱老農溪南溪北水車風稻頭的樂粘朝露
步入明珠翠網中

次韻施進之惠紫芝朮

山精媒長生仙理信可詰梨棗本寓言杞菊亦凡質幽
人愛懼儒藥鼎薦珍物絕粒謝煙火耘苗換肌骨摩抄
菜蕪甑塵生不須拂

題醉道士圖

蜩鷓鴣任過前壺中春色爰中天朝來兀兀三杯後
且作人間有漏仙

五雜組四首 并序

古樂府有五雜組及兩頭纖纖殆類酒令孔平仲最
愛作此以爲詩戲亦效之

五雜組同心結往復來當窓月不得已話離別

五雜組流蘇縷往復來臨行語不得已上馬去

五雜組回文機往復來錦梭飛不得已獨畫眉

五雜組綵絲鍼往復來鳥投林不得已夢孤衾

兩頭纖纖二首

兩頭纖纖探官繭半白半黑鶴氅緣膈膈膊膊上帖箭

磊磊落落封侯面

兩頭纖纖小秤衡半白半黑月未明膈膈膊膊扣戶聲

磊磊落落金盤冰

再賦五雜組四首

五雜組綬若若往復來大車鐸不得已去丘壑

五雜組侯門戟往復來道上檄不得已天涯客

五雜組漢旌旆往復來賓鴻字不得已餐瓊使
五雜組非煙雲往復來朝馬塵不得已嬰龍鱗

夜坐聽雨

四檐密密又踈踈聲到蒲團醉夢蘇恰似秋眠天竺寺
東軒窗外聽跳珠

寒夜獨步中庭

忍寒索句踏霜行刮面風來鬚結冰倦僕觸屏呼不應
梅花影下一窓燈

會散野步

忘却下樓扶我誰接離顛倒酒沾衣貪看雪樣滿街月
不上籃輿步砌歸

步砌吳語也

孟嶠之家姬乞題扇二首

輕雲翠英

輕煙小雨釀芳春草色連天綠似裙斜日滿樓人獨望
斷鴻飛入萬重雲

翠袖凌寒弄月明梅花影下醉三更一天風露誰驚覺
寂寞空杯綴落英

周畏知司直得湖南帥屬過吳門復用己丑年

倡和韻贈別

邂逅婆娑失少年劇談抵掌尚超然君猶拄笏看山去
我且披蓑聽雨眠京洛分襟疑後會江吳把酒悟前緣
暫來忽去都如夢疑是陳卿竹葉船

偶書

以下十五首三十年前所作續得殘藁附此卷末

伯勞東去燕西飛同寄春風二月時可恨同時不同調
此情那得更相知

雙燕

底處飛雙燕銜泥上藥欄莫教驚得去留取隔簾看

戲題牡丹

主人細意惜芳春寶帳籠堦護紫雲風日等閒猶不到
外邊蜂蝶莫紛紛

春日三首

藥欄花煖小鴉眠雪白晴雲水碧天煮酒青梅寒食過
夕陽庭院鎖鞦韆

西窓一雨又斜暉睡起薰籠換夾衣莫放珠簾遮洞戶

從教燕子作雙飛

雙鯉無書直萬金畫橋新綠一篙深青蘋白芷皆愁思
不獨江楓動客心

高樓曲

以下六首皆
夢境所得

歲暮天涯客黃昏蝙蝠飛高樓人不到小雨怯單衣

湘江怨

蘋芷迷煙路蓮舟忘却歸夜寒江水黑風雨夢如飛

採蓮三首

溪頭風迅怯單衣兩槳凌波去似飛折得蘋花雙葉子
綠鬟撩亂帶香歸

藕花深處好徘徊不奈華筵苦見催記取南溼芙蓉露

月明風熟更重來
柔櫓無聲坐釣魚浪花飛點翠羅裾空江日暮無來客
腸斷三湘一紙書

弔陳叔寶詞

賞心亭上再來遊煙月迷人獨自愁行到江邊無去路
却隨潮水過揚州

石湖居士詩集卷十一

石湖居士詩集卷十二

渡淮

八月十一日渡盱眙過泗州順風如飛

船旗袞袞徑長淮汴口人看撥不開昨夜南風浪如屋
果然雙節下天來

汴河

汴自泗州以北皆涸草木生之土人云本朝恢復駕回即河須復開

指顧枯河五十年龍舟早晚定疏川還京却要東南運
酸棗棠梨莫蒼然

虞姬墓

在虹縣下馬鋪北三十七里

劉項家人總可憐英雄無策庇嬋娟戚姬葬處君知否
不及虞兮有墓田

宿州

五更出城鬼火滿野

狐鳴鬼嘯夜茫茫元是官軍舊戰場土伯不能藏碧燐
三三兩兩照前岡

雷萬春墓

在南京城南環以小牆榜曰忠勇雷公之墓

九隕元身不隕名言言千載氣如生欲知忠信行蠻貊
過墓胡兒下馬行

雙廟

在南京北門外張巡許遠廟也世稱雙廟南京人呼為雙王廟

平地孤城寇若林兩公猶解障妖侵大梁襟帶洪河險
誰遣神州陸地沉

睢水

睢口石門已隕河亦塞即項羽大敗漢兵處

一戰填河擁漢屯拔山意氣已鯨吞直南即是陰陵路
兵果難將勝負論

伊尹墓

在空桑北一里有磚堠刻云湯相伊公之墓相傳墓左右生棘皆直如矢

三尺黃墟直棘邊此心終古享皇天汲書猥述流傳妄
剖擊嗟無咎單篇

留侯廟

在陳留縣中案王原叔諸家攷子房所封乃彭城留城非陳留也自宋武下教修復時其失久矣

功成輕舉信良謀心與鷗夷共一舟呂媪區區無鳥喙
先生輕負赤松遊

西瓜園

味淡而多液本燕北種今河南皆種之

碧蔓凌霜卧軟沙年來處處食西瓜形模濩落淡如水
未可蒲萄首藉誇

宜春苑

在舊宋門外俗名東御園

石渠言集卷十二
一
狐塚獲蹊滿路隅行人猶作御園呼連昌尚有花臨砌
腸斷宜春寸草無

京城

倚天櫛櫛萬樓棚聖代規模若化成如許金湯尚資盜
古來李勣勝長城

護龍河

在新宋門外中有網船數十艘

新郭門前見客舟清漣淺淺抱城樓六龍行在東南國
河若能神合斷流

福勝閣

曹太皇所建奇崛冠京城中

翬飛五級半空翔指點樓欄說太皇劫火不能侵願力
歸然獨似漢靈光

相國寺

寺榜猶祐陵御書寺中雜貨皆胡俗所需而已

傾檐缺吻護奎文金碧浮圖暗古塵聞說今朝恰開寺
羊裘狼帽趁時新

州橋

南望朱雀門北望宣德樓皆舊御路也

州橋南北是天街父老年年等駕迴忍淚失聲詢使者
幾時真有六軍來

宣德樓

虜加崇葺爲改曰承天門

曉闕叢霄舊玉京御牀忽有犬羊鳴他年若作清宮使
不挽天河洗不清

市街

京師諸市皆荒索僅有人居

梳行訛雜馬行殘藥市蕭騷土市寒惆悵軟紅佳麗地

黃沙如雨撲征鞍

金水河

在舊封丘門外河中多大石皆良嶽所墮

菜市橋西一水環宮牆依舊俯清灣誰憐磊磊河中石

曾上君王萬歲山

壺春堂

嶽廟稱道君時所居在撫芳園中俗呼為八滴水閣者

松漠丹成去不歸龍髯無復有攀時芳園留得觚稜在

長與都人作淚垂

漸水

黃河將決其地則伏流先出名曰漸水河身日徙而南過封丘至昨城界中已有漸水去汴京大約五十里耳

黃流日夜向南風道出封丘處處逢紫蓋黃旗在湖海

故應河伯欲朝宗

李固渡

洪河萬里界中州倒捲銀潢聒地流列弩燔梁那可渡

向來天數亦人謀

天成橋

碑石蔡京書在濬州岡上驛中東廡下舊浮橋在此今河徙南行矣

一岡邑屋舊河灘却望河身百里間湧土漲沙漫白道

天成橋石在高山

舊滑州

在濬州側積水中為河所淪久矣大伾即黎陽山西望積水不遠

大伾山麓馬徘徊積水中間舊滑臺漁子不知興廢事

清晨吹笛棹船來

扁鵲墓

在湯陰伏道路傍相傳墓上土可療病禱而求之或得小圓如丹藥

活人絕技古今無名下從教世俗趨墳土尚堪充藥餌

莫嗔醫者例多盧

美里城在姜河上四垣儼然

陵谷遷移尚故墟天盈商罪未蠲除古今行客同嗟罵
何止三篇秦誓書

文王廟在姜里城南

堂堂十亂欲興周肯使君王死作囚巧笑入宮天亦笑
可憐元不費深謀

相州推車老人自言吾州韓魏公鄉里南北兩墳尚無恙

秃中鬢髻老扶車茹痛含辛說亂華賴有鄉人聊刷恥
魏公元是魯東家

秦樓在相州寺中上有貴人幕而觀使客云是郡主太守之妻也大抵相臺傾城出觀異

於他州

欄街看幕似春遊斑犢雕車碧畫油奚女家人稱貴主
縷金長袖倚秦樓

翠樓在秦樓之北樓上下皆飲酒者

連袵成帷迓漢官翠樓沽酒滿城歡白頭翁媪相扶拜
垂老從今幾度看

講武城在漳河上曹操所築周遭十數里鑿城為道而過

阿瞞虢武蓋劉孫千古還將鬼蜮論縱有周遭遺堞在
不如魚復陣圖尊

七十二塚在講武城外曹操疑塚也森然彌望北人比常增封之

一棺何用塚如林誰復如公負此心聞說羣胡為封土

世間隨事有知音

趙故城

在邯鄲縣南
延袤數十里

金石笙篁絕代無
颺颺藜藿正乘除
園翁但愛城泥煖
侵早鋤霜種晚蔬

邯鄲道

即昔人作
黃梁夢處

薄晚霜侵使者車
邯鄲阪峻且徐驅
困來也作黃梁夢
不夢封侯夢石湖

藺相如墓

在邯鄲縣南
趙故城之西

玉節經行虜障深
馬頭釀酒奠疎林
茲行壁重身如葉
天日應臨慕藺心

邯鄲驛

驛後有磔犬祭天者大抵盡
為胡俗漢戚夫人縣人也

長安大道走邯鄲
倚瑟佳人悵望間
若見羶腥似今日
漢宮何用憶關山

叢臺

在邯鄲
北門外

憑高閱士劔如林
故國風流變古今
袷服雲仍猶左袵
叢臺休恨綠蕪深

臨洺鎮

去洺州三十里
洺酒最佳
伴使以數壺及新兔見餉

竟日霜寒暮解圍
融融桑柘染斜暉
北人爭勸臨洺酒
云有棚頭得免歸

邢臺驛

信德府驛也
去太行最近城外
有荷塘柳隄頗清麗
不類河朔

太行東麓照邢州
萬疊煙螺紫翠浮
誰解登臨管風物
枯荷老柳替人愁

柳公亭在邢州城北小園中伴使邀客入遊云

極崿

主人敬客有餘情催喚繩牀坐柳亭曲水流觴非故物
馬鞍山色舊青青

內丘梨園內丘鶯梨為天下第一初熟收藏十月出汗後方佳園戶云梨至易種一

接便生可支數十年吾家園者猶聖宋太平時所接

汗後鶯梨爽似冰花身耐久老猶榮園翁指似還三笑
曾共翁身見太平

大寧河在內丘北河之東皆梨棗園二果正熟

梨棗從來數內丘大寧河畔果園稠荆箱擾擾攔街賣
紅皺黃團滿店頭北人謂道上聚落為店頭

柏鄉唐志堯山乃古柏仁俗傳或以此柏鄉為柏人

貫生名壓漢公卿自古逢讎不反兵仇虜滔天無敢動
柏鄉空溷迫人名

唐山即堯山金主之父名宗堯改山名山下有放勳廟

勳唐遺德照清灣百聖聞風不敢班何物苦寒胡地鬼
二名猶敢廢堯山

光武廟在柏鄉北兩壁有二十八將像廟前有石人皆自腰而斷俗傳光武夜過以

為生人問途不應劔斬之云

雲臺列像拱真人野老猶誇建武春不用劔鋒能制石
冰河一瞥已通神

趙州石橋在城南汶河上以鐵筍卯貫石捲篷不類人工

石色如霜鐵色新
汝河南北尚通津
不因再度皇華使
誰洗奚車塞馬塵

柏林院 即東院趙州禪師道場在城中

胡來胡現劫灰深
風鼓三灾海印沈
急過當年無佛處
庭前空有柏森森

藥城 縣極草草伴使怒頓餐不精欲榜縣令跪告移時方免

頽垣破屋古城邊
客傳蕭寒爨不煙
明府牙緋危受杖
藥城風物一淒然

呼沱河 即光武渡冰處在真定南五里

聞道河神解造冰
曾扶陽九見中興
如今爛被胡羶沈
不似滄浪可濯纓

真定舞 虜樂悉變中華惟真定有京師舊樂工尚舞高平曲破

紫袖當棚雪鬢凋
曾隨廣樂奏雲韶
老來未忍者婆舞
猶倚黃鐘袞六么

東坡祠堂 在中山府學在化原坊

化原坊裏尚覺堂
聞道蘇仙有奉嘗
想見當年行樂處
牙旗鐵馬照金章

松醪 中山酒猶名松醪然甚清

松風激罷讀離騷
翰墨仙翁百代豪
一笑瓊裘那辨此
當年嵇阮尚鋪糟

望都 縣人多癯婦人尤甚相傳縣東接唐縣病癯者甚衆此縣蓋染其風土縣西有小阜

山曰由

荒寺疎鐘解客鞍
由山東畔白煙寒
望都風土連唐縣
翁媪排門帶瘦看

安肅軍

舊梁門三城今惟一城
有人煙澹澹皆酒矣

從古銅門控朔方
南城煙火北城荒
臺家抵死爭澹灤
滿眼秋蕪襯夕陽

出塞路

安肅北門外大道容數車方軌

當年玉帛聘遼陽
出塞曾歌此路長
漢節重尋舊車轍
插天猶有萬垂楊

白溝

在安肅北十五里闊纔丈餘古亦名巨馬河本朝與遼人分界處

高陵深谷變遷中
佛劫仙塵事事空
一水涓流獨如帶
天應留作漢提封

太行

渡河即與太行俱北至燕猶未斷大抵東至薊門北至塞北西接奚界也若晴日無埃則出京至封丘已望見之矣

西北浮雲捲暮秋
太行南麓照封丘
橫峰側嶺知多少
行到燕山翠未休

固城

自白溝十五里至固城鎮舊遼界也水味極惡用柳作大捲汲井謂之涼罐

柳捲涼罐汲泉遙
味苦仍鹹似海潮
却憶徑山龍井水
一杯洗眼洞層霄

范陽驛

涿州驛牆外有尼寺二鐵塔夾塗如雪俯瞰驛中

郵亭偏仄但宜冬
恰似披裘坐土空
枕上驚回丹闕夢
屋頭白塔滿鈴風

定興

舊黃村虜新建為縣井邑未成

新城遷次少人煙桑柘中間井徑寒亦有染人來賣纈
淡紅深碧挂長竿

清遠店

定興縣中客邸前有婢兩頰刺逃走二
字云是主家私自黥涅雖殺之不禁

女僮流汗逐氈鞞云在淮鄉有父兄屠婢殺奴官不問
大書黥面罰猶輕

琉璃河

又名劉李河在涿州北三十里極清
此茂林環之尤多鴛鴦千百為羣

煙林葱蒨帶回塘橋眼驚人失眠鄉健起塞帷指病眼

琉璃河上看鴛鴦

此河大中祥符間路振乘輅錄亦謂
琉璃河惟嘉祐中宋敏求入番錄乃

謂之六里河大抵
胡語難得其真

灰洞

在涿北燕南之間兩旁皆高岡無風
而路極狹塵土空積咫尺不辨人物

塞北風沙漲帽檐路經灰洞十分添據鞍莫問塵多少

馬耳冥濛不見尖

良鄉

燕山屬邑驛中供金粟梨天生子
皆珍果又有易州栗甚小而甘

新寒凍指似排籤村酒雖酸未可嫌紫爛山梨紅皺棗

總輸易栗十分甜

盧溝

去燕山三十五里虜以活鴈餉客積數十
隻至此放之河中虜法五百里內禁採捕

也故

草草魚梁枕水低忽忽小駐濯漣漪河邊服匿多生口

長記軺車放鴈時

此河宋敏求謂之蘆菘
即桑乾河也今呼盧溝

燕賓館

燕山城外館也至是適以重陽虜重此
節以其日祭天伴使把菊酌酒相勸西

望諸山皆縞云
初六日大雪

九日朝天種落驩也將佳節勸杯盤苦寒不似東籬下

雪滿西山把菊看

橙網

燕城外遇數車載新橙云
修貢種之汴京擷芳園也

堯舜方堪橘柚包穹廬亦復使民勞華清荔子沾恩幸
一騎回時萬騎騷

蹋鴟巾

接送伴田彥臯愛予巾裏求
其樣指所戴蹋鴟巾有愧色

重譯知書自貴珍一生心愧蹋鴟巾雨中折角君何愛
帝有衣裳易介鱗

耶律侍郎

兵部侍郎耶律寶館伴使也
字如提刑運使等字亦指以問

乍見華書眼似麀低頭慚愧紫荷囊人間無事無奇對
伏獵今成兩侍郎

龍津橋

在燕山宣陽門外以玉石
為之引西山水灌其下

燕石扶欄玉作堆柳塘南北抱城迴西山剩放龍津水
留待官軍飲馬來

燕宮

宏侈過汴京
楊王亮所作

金盆濯足段文昌乞索家風飽便忘他日楚人能一炬
又從焦土說阿房

會同館

燕山客館也授館之明日
守吏微言有議留使人者

萬里孤臣致命秋此身何止一漚浮提攜漢節同生死
休問羝羊解乳不遼人館本朝使
謂之會同館

石湖居士詩集卷十二

石湖居士詩集卷十三

與吳興薛士隆使君遊弁山石林先生故居

此卷

乾道壬辰冬赴廣西道中所作舊名南征小集

白蘋有嘉招蒼弁得勝踐會心不憚遠乘興恐失便
籃輿犯窮臘共作忍寒面溟濛雲釀雪浩蕩風落鴈松篁
漸清幽猿鶴或悲怨英英文章公作舍鎖葱蒨嶢峰俯
前榮佳木秀諸院窮搜發山骨林立侍談讌西巖踞熊
虎東巖峙屏案履綦故仿佛蓋及已零亂經營三十年
成毀一飛電摩挲土花碧小立為三歎

自石林回過小玲瓏巖竇益奇昔為富人吳氏
所有今一子尚幼山檢校於官

石湖言集卷十三
一丘乃中虛洞穴四無礙却略巖岫杳黝糾石牀怪蒼
牛飲前池碧鱗灑微瀨雕鏤具百巧圖畫窘千態哀湍
寫壞磴凍雨濕空翠踈梅照草棘瘦竹拔蹊隧當時閭
閻子目力在塵外孤童藐難料竒事疑有待誰歟千金
捐來換把茅蓋不仙亦足豪衆垤皆累塊我評北山遊
勝絕此無對玲瓏詎可小孰能爲之大

濯纓亭在吳興南門外

淒風急雨脫然晴當道橫山似見迎野水茫茫何用許
爛供遊子濯塵纓

乾道己丑守括被召再過釣臺自和十年前小
詩刻之柱間後五年自西掖帥桂林癸巳元日

雪晴復過之再用舊韻三絕

浮生渺渺但飛埃問訊星宮又獨來天上人間最高處
爲君題作鬱蕭臺

拙踈何計補消埃慚愧雙旌去復來三過溪門今老矣
病無脚力更登臺

界天山雪淨黃埃溪上扁舟夜汎來匝地東風勸椒酒
山頭今日是春臺

玉山道中

常山多清溪玉山富喬木行色鬱蒼然頗亦慰愁目梅
花隔籬見瓏璵照茅屋晚來風刮地想見飄香玉

桃花壇下望龜峰

石壇無土謾嶽岑何自能生小柏林擬擘蛤蜊龜殼上
病來不殺嬾登臨

清音堂與趙德莊太常小飲在餘干琵琶洲傍
洲以形似得名

曲浦彎環繞縣青一盃間客兩飄零琵琶不語蒼煙暮
山水清音著意聽

過鄱陽湖次游子明韻

春工釀雪無端密大塊囊風不肯收休問巉巖與欹側
我今年靡共波流野鷹兀兀平沙上折葦蕭蕭古渡頭
滿眼荒寒底處所令人腸斷五湖舟

豫章南浦亭泊舟二首

繡檻臨滄渚牙樯插暮沙浦雲沉斷鴈江雨入昏鴉野
曠天何近春寒歲未華來朝風一席隨處且浮家
閨歲花光晚霜朝草色荒趁墟猶市井收潦再耕桑客
路東西懶江流日夜忙長歌情不盡一酌醉滄浪

清江道中橘園甚夥

芳林不斷清江曲倒影入江江水綠未論萬戶比封君
瓦屋人家衣食足暑風汎花蘭芷香秋日籬落明青黃
客舟來遲佳景盡但見碧樹愁春霜

清江臺在臨江郡圃西岡上張安國題榜

南來富壽岡形勝此蟠結岑巒戴高臺欄檻了風月蕭
灘曳長煙閣阜炯殘雪江流當帶橫練練浮木末天風

石澗言集卷一三
來無鄉萬里吹醉纈登臨信竒事忍凍亦癡絕故人春
夢覺遺墨秋蛇掣浮雲真可哈揮解酹空闊

自冬徂春道中多雨至臨江宜春之間特甚遂
作苦語

客行無晴時泔泔如漏天東吳至西江舊歲接新年蠟
屐驚踵決油衣笑鶉懸掀淖起復什頃步如重關略似
鴨與猪汨沒泥水闌我塗未渠窮一晴愧天慳倒塔橋
已斷壁破渡無船路人相告語未到先長歎薄晚得磽
确稍入袁州山不辭石齧足聊免泥沒鞵自古行路吟
聽者凋朱顏軒渠尚能賦詩人類癡頑

玉虛觀去宜春二十五里許君上升時飛白茅

數葉以賜王長史王以宅爲觀觀旁至今有仙
茅極異常草備五味尤辛辣云久食可仙道士
煮湯以設客

白雲堆裏白茅飛香味芳辛勝五芝揉葉煮泉摩腹去
全勝石髓畏風吹

入分宜

新喻渡無橋分宜橋有欄孰歟兩徼吏賢否已判然堂
上著威信四郊如目前入國政可知茲焉略闕觀

方竹杖

竹君箇箇面團團此士剛方獨凜然外貌中心俱壁立
任從癡子削教圓

游仰山謁小釋迦塔訪孚惠二王遺蹟贈長老
混融

堵田溪淵清洄洄梅洲問路寒雲堆連空磴道虬尾滑
竹輿直上無梯階蒼官來迎夾道立相逢無言心眼開
翠微中斷雪礪吼兩耳不辨供喧厓林間靜極成斷相
政要萬壑號風雷山如蓮盆繞金地龍官避席餘蒼崖
祖師抱膝坐古塔大禪海浪翻天來騰空狡獪我未暇
拄杖踏濕撞莓苔問龍亦借一席地解包聽雨眠西齋
當年公案忌錯舉神通佛法同坑埋混融菴中的的意
笑我舌本空崔魏茲事且置飽喫飯稊田米賤如黃埃
大雨宿仰山翌旦驟霽混融云無乃開仰山之

雲乎出山道中作此寄混融

誰開大仰雲此豈吾力及日光千丈毫彈指衆峰立衡
山捲陰氣海市發冬蟄韓蘇兩枯魚出語自濡濕人厄
與天窮底用苦封執但喜拄杖俊仍欣芒屨澁向來三
三尺泥有足似羈馬龍淵古橋皴獺徑寒溜泣龍淵獺
徑皆山
中往春淺山容瘦風饕澗聲急一簞寄前村野藪旋收
拾貓頭髧筍尖雀舌剥茶粒土毛冠江西斗酒況可挹
聊同一笑粲緩賦百憂集

初入湖南醴陵界

崖樹陰陰夾暝途出山歡喜見平蕪一春客夢飽風雨
行盡江南聞鷓鴣

醴陵驛

綠水橋通縣縣前浮橋名門前柳已黃人稀山木壽土瘦水
泉香乍脫泥中滑還嗟埃子長楮州何日到鼓柂上滄
浪

湘潭道中詠芳草

積雨倏然晴秀野若新沐芳草徑寸姿中有不勝綠萋
萋路傍情頗亦念幽獨驅馬去不顧斷腸招隱曲

初見山花

三日晴泥尚沒鞞幾將風雨過年華湘東二月春纔到
恰有山櫻一樹花

楮洲道中

煙凝山如影雲褰日射毫桃間紅樹迴麥裏綠叢高客
子歎游倦田家甘作勞乘除吾尚可未擬賦離騷

浮湘行

湘山中間湘水橫綠蘋葉齊春漲生盤渦汙汙去無聲
吾乘桂舟沂中濡揚波擊汰雙櫓擗輶轡引竿如牛鳴
篙師絕叫疊鼓轟潛魚跳奔乳猿驚煖煙浮空晝夢騰
山長水遠天無情吹簫拊瑟弔湘靈水妃風御續來迎
問客良苦遠征行昨者斧鉞下青冥命我盡護安南兵
嶺海一視如王庭布蕩陽春濯腐腥王事靡盬來有程
匪躬之故惟爾眈芳洲杜若空青青九歌淒悲不可聽
願賡楚調歸和平

湘江洲尾快風挂帆

船頭雪浪吼奔雷十丈高帆滿意開我自只憑忠信力
風應不為世情來兒童屢惜峰巒過將士猶教鼓笛催
明日祝融天柱去更煩先捲亂雲堆

泊湘江魚口灘

知時社燕語檣竿游子奔波自鮮歡趁客賣魚雙漿急
隔林沽酒小旗寒瀟湘渾似日南落嶽麓已從天外看
薄暮灘前收百丈卧聞三老報平安

謁南嶽

湘中固多山夾岸萬馬屯坡陀無敢高似遜喬嶽尊曉
投望雲亭衆丘拱牆藩濃嵐忽飄蕩積翠浮雲端天柱

已峻極祝融更高寒紫蓋鬱當中岡勢洶崩奔峙為赤
帝峰下直宮孺垣角樓捧雙闕圓方模九閣炎符撫中
興南正實司天草木薰協氣山林奠神姦妥靈有備物
龍卷鸞旗軒走忝桂林伯與神俱南轅上謁禮亦宜為
國憂元元心空禍福相古井寒無瀾杯琰不用擲但願
歸田園相傳壁畫好拂拭塵埃昏弓刀立壯士劔珮班
靈官後宮行樂處窈窕千雲鬟錦地舞月晝珠櫳侍春
閑武氏筆已絕梗概猶清妍後宮壁畫武洞清筆極禁
籀富貴之趣紹興二十年

火後為雨所敗後人摹舊蹟更畫猶有彷彿旋車闔廟去頗厭山市喧勝果
招客遊徑排集賢關梵皮絢雜組衡嶽藏經皆錦絲竹
簾護之孟蜀時捨簾
乃其戶部侍郎彬所造錫杖鏘古鑲開山善果尊者所遺避雨勝業閣在嶽
祠之

南晚晴留凭欄石廩映岫嶺望眼增孱顏上封眇孤絕

南臺半雲煙碧岫有靈藥朱陵巢洞仙晚晴乃盡見諸峰病倦

懶幽討山僧鑄我頑松樛唐季枝柏跼隋初根竒事不

勝紀重遊當細論廟路三十里夾岸大松五季時馬氏所植勝業寺柏不見根偃於地出入

榦龍蟠占數畝世所未之見傳為隋時物

兩蟲

鷓鴣憂兄行不得杜宇勸客不如歸天涯羈思難繪畫
惟有兩蟲相發揮

衡陽道中二絕

桑下蕪菁晚高花出短籬茅簷少春事惟記浴蠶時
黑殺鑽籬破花猪突戶開空山竹瓦屋猶有燕飛來

衡州石鼓書院

古磴浮滄渚新鬢鎖碧蘿要津山獨立巨壑水同波俎
豆彌文肅衣冠盛事多地靈鍾傑俊寧但拾儒科

合江亭并序

合江亭即石鼓書院今為衡州學宮一峰特立踞兩水
之會湘水自右蒸水自左俱至亭下合為一江而東
有感而賦韓文公所謂淶淨不可唾者即此處今有
淶淨閣

石鼓鬱嵯峨截然踞滄洲有如古盟主勤王會諸侯蒸
湘伯叔國稟命會葵丘敢不承載書戮力朝宗周混為
同軌去崩奔不敢留宜哉百谷王博大無與儔擅毳昔

亂華車馬隔中州未聞齊晉勲包茅費誅求威文亦弘
規尚取童子羞安知千載後但泣新亭囚我題石鼓詩
願言續春秋

沈家店道傍棣棠花

乍晴芳草競懷新誰種幽花隔路塵綠地縷金羅結帶
爲誰開放可憐春

邵陽口路麤惡積雨餘濘難行

平生春夢境俛仰撫八極湖南天盡頭夢亦未常識豈
知多病身今乃著脚歷山泉澄不清崖土壘而赤坳堂
滑勝油累塊硬逾石貪夫一回顧壯士三歎息不知清
淑氣果復曾鬱積我豈鄙夷之短咏聊一劇

馬鞍驛飯罷縱步

食飽倦輿馬散策步前岡意行踏芳草蕭艾菊生香春
事甚寂寥山桃帶松篁游蜂入菜花此豈堪蜜房今年
蠶出遲柘葉分寸長好晴纔數日歲事未渠央

黃巖嶺

薄遊每違已茲行遂登危峻阪盪胸立恍若對鏡窺傳
呼半空響濛濛上煙霏木末見前驅可望不可追躋攀
百千盤有頃身及之白雲叵攬擷但覺沾人衣高木傲
燒痕蔥蘢茁新萸春禽斷不到惟有蜀魄啼謂非人所
寰居然見鋤犁山農如木客上下翔以飛寧知有康莊
生死安嶮巖室屋了無處恐尚槽巢栖安得拔汝出王

路方清夷

衡永之間山路艱澁薄晚吏卒闕云漸近祁陽
路已平夷皆有津津之色

朝登赤土嶺暮入黃泥谷春江弄花月歸夢恍在目覺
來行路難杜宇叫高木凹中泥沒踝凸處石齧足坐輿
我尚病想見肩輿僕衡陽復祁陽可暫不可宿晚來出
前岡路坦亭堠促將士走相賀喜色如膏沐人生本無
悶逆境要先熟不從憂患來安識平爲福夷塗不常遇
歷險始知足

書浯溪中興碑後

并序

乾道癸巳春三月余自西掖出守桂林九日渡湘江

游浯溪摩挲中興石刻洎唐元和至今遊客所題竊
謂四詩各有定體頌者美盛德之形容以其成功告
於神明者也商周魯之遺篇可以槩見今元子乃以
魯史筆法婉辭含譏蓋之而章後來詞人復發明呈
露之則夫磨崖之碑乃一罪案何頌之有竊以爲未
安題五十六字刻之石傍與來者共商略之此詩之
出必有相詬病者謂不合題破次山碑此亦習俗固
陋不能越拘攣之見耳余義正詞直不暇卹也
三頌遺音和者希丰容寧有刺譏辭絕憐元子春秋法
都寓唐家清廟詩歌詠當諧琴搏拊策書自管璧瑕疵
紛紛健筆剛題破從此磨崖不是碑

愚溪在零陵城對岸渡江即至溪甚狹一石澗
耳蓋眾山之水流出湘中

一水彎環羅帶闊千古零陵擅風月取名如許安得愚
因病成妍却奇絕至今鏡淨不可唾猶恐先生遺翰墨
澤及溪流不庇身付與後來商巧拙我欲扁舟窮石澗
春漲未生寒瀨咽紛紅駭綠四山空惟有風篁韻騷屑
清溪東去客西征鈇鉞潭邊聊駐節何時隨汝下瀟湘
歸路三千櫓伊軋鈇鉞潭形似之也

宿清湘城外田家

驅馬力猶彊奏牀身始疲浮浮雲拂帳滴滴水鳴籬未
熟燈前夢閑尋道上詩湘中多夜雨客枕最先知

宿深溪驛去廣右界只一程

北戶書頻到南雲鴈不飛試評騎馬路何似釣魚磯擊
柝黃茅店篝燈白竹扉故園桑柘煖亦有稻粱肥

石湖居士詩集卷十三

石波言集卷十三
十一

唐

